

許氏幼科七種

辛 怡堂散記上卷



怡堂散記



怡堂散記序

橡村痘訣一書予既讀而序之矣
橡村先生以醫名吾鄉固不特善
治小兒更不特痘症予頗疑橡村
胡不盡出所學為壽世資而僅使
蒙其庥者在小兒也令橡村又出

書一冊曰怡堂散記分上下二卷
又痘訣餘義一卷予受而讀之其
書列病症詳醫方以已所臨治有
驗者悉書其原委曲折各加論辯
以與古相發明蓋進而上焉不獨
使幼孤得遂長矣予不知醫竊怪



岐黃以降其書幾汗牛充棟學者
習焉而守其法足矣胡為作者代
興必各矜創獲迭擅神奇乃以成
救世之效以是知理之無窮而其
法亦隨時有異也夫靈素經書千
古不易而天地氣化人生稟賦隨



時為厚薄且南北異宜山川間隔
一郡一鄉氣感各別即一鄉之中
又隨世變轉而寒熱水旱之不齊
錯出乎其中吾見今之疾不必同
古之疾也又況藥物之產隨地氣
變遷或同一名而古今迴殊或猶

是一物而前人審驗未真久而益
辨者而謂第執成言遂可自足也
哉橡村博覽古書相時症之變融
會衷通而出之其於藥物皆細加
考驗謂必使吾之精神與藥之氣
味兩相融洽而後藥為我用其用




力也勤其宅心也誠矣今不敢自
秘將出以廣其傳吾不知此書
盡今之病症及治法與否傳之
來又有因時而變更者與否要其
有益於時者固已多也又况雜采
聲書俾知人物之生與天地陰陽

相消息推氣化之原以正性命之
養尤邃然通道術之要而士君子
所當深致體驗者哉極焉而試其
功用吾見較前刻之大而遠也於
是乎言

嘉慶二年歲次丁巳秋九月竹溪

曹文植拜手



怡堂散記上卷

序目

散者無頭無緒不整不齊之謂老醫臨症數十年終日應酬不暇得心應手之處思欲記之有時研硯而客至有時執筆而飯熟於是失者十之七心之所向欲捨不能隨時記憶存於腹藁大概不在途中則在枕上此診治之散記也講習古方節錄名言蒐羅於寒夜是涉獵之散記也記雖不多類而推之其理不外是矣

風痰 七條

驚風發搐 六條

春杪夏初多見發熱不退之症治之屢驗因記之

論暑月吐瀉初起須用黃連香薷飲 七條

甲辰秋時痢甚計其所見復論症記之 二十六

雜治得心隨錄可爲法者二十二症

方脉治驗隨錄十五症

病可治病家不知信任者錄四

見而不能治者錄四

見聞事實錄四

婦人病

看虎口

小兒常有之病

幼科少見二症

華先生中藏經論治

喻嘉言先生先議病後議藥

與門人定議病式

醫家必讀全經始知治法

診治雜言



散記卷上

古歙許豫和宣治氏著

全

姪培根樹人男培鑛鑄人

姪孫覲珪執之

風痰

風痰一症乳兒最多四時皆有大概冬春之交宜溫散荆防甘桔橘半生薑杏仁蘓子之類夏令宜清散杏仁牛蒡梔子之類秋令宜清潤只壳瓜蒌之類冬令嚴寒有用蘇黃湯而解者肺爲嬌嫩之臟總宜踈解不得妄投丸散肺雖喜潤胃中濕痰宜燥小兒乳膩生痰外症有鼻水多



北京中醫藥大學圖書館藏

涕淚二陳爲治痰總劑合之前胡桔梗荆防蘓子枳壳麥
芽杏仁之類或加生姜葱白結者散之保赤之善也
肺喜潤潤之中亦有分辨如杏仁蘓子溫而潤者也宜於
冬春杏仁牛蒡散而潤者也宜於夏杏仁瓜蒌則清而潤
者矣宜於秋燥能知此等界限則用藥不雜

瓜蒌一味能發嘔易滑泄乳兒無用瓜蒌之理穀食之兒
燥火傷肺嗽久不止乃可用之

半夏毒輕薑汁製而陳者性平故可入君子湯南星毒烈
實非良藥製以牛胆之苦寒病久膠結或可少投時行感

胃無可用之理竹瀝薑汁之潤下海石之鹹能軟堅尤非
風痰可輕試者

書云蚕與馬並屬午火在卦爲離主心又云蚕食而不飲
性燥得濕則腐得風則僵故能宣風化痰辛溫之藥也風
寒閉結者宜之痰熱結聚非所宜也

肺爲貯痰之器只有開提一法爲解化之用世俗之化痰
丸徒傷胃氣耳至若王隱君之礞石滾痰丸爲治頑痰怪
症而設於小兒有何干涉

風痰乳滯小兒輕病不從踈解而事丸散殺兒實多目睹



心傷爲之苦口

驚風發搐

辛亥首春嬰幼多驚風之患此天行之病氣候使然經曰
巳亥之歲上見厥陰厥陰司天其化爲風小兒純陽之體
冬月伏陽在內生痰生熱乘春氣而病發驚風作矣醫家
視其色脉察其虛實當爲之清痰熱平肝風則風熄而熱
平粗工昧此但持通套之方予見用荆防柴葛者病不除
而加甚用羌活者一服而驚厥不回因製對症之方取效
甚多示以爲法

